



La dì che il sior Marangon al veve decidût di vendi la sô femine al jere un joibe. Vinars di sere al veve bielzà scrit l'avîs par Citta Nostra, sabide al veve publicât chel su Subito.it e domenie, par no lassâsi in bande nissune pussibilitât, al veve spindût il desio par un trafilet sclagn e minudin inte ultime pagjine dal Messaggero Veneto.

Lunis di sere l'afâr al jere fat. A vevin clamât a desenis, ancje se tancj dome par tirâ jù il presit o par sigurâsi dal bon stât de so Mariute, cirint di capî se e veve cualchi difiet. Il sior Marangon ae fin al veve sielt un ciert Londero, di Glemone, che i someave persone affidabile e no il solit menebigui. Si veve fat dâ la direzion di pueste e la matine dopo, rivade la notifiche dal versament sul cont in bancje, al veve metût in man a Mariute une valisute e la veve mandade a chel paîs. Propit Glemone, sî; cuntun pataf sul cûl e un itinierari di Google maps sul telefonut.

Ta chê sere, al pensave, al varès podût poiâ i vues su la sô poltrone, denant dal caminet, leint la Gazete compagnât dal cricâ dal fûc, fumant la pipe e gjoldintsi i glotârs dal so lat cjalt, cence lis nainie e la vosate di cheche che i cridave di continuo.

Vendint la femine al veve vuadagnât il timp par stâ ben, al pensave.

E al jere lât indenant a pensâlu ancje cuant che, gnervôs e malcuiet, intal rivoc di cidinôr de cjase vueide, nol veve capît di vê cuistât ancje une altre robe: la stufe!

Nol vâl vendi il cjôt, par comprâ il purcit

di Raffaele Serafini
Contis dal ostîr